

Մ Ա Յ Ր Ա Թ Ո Ռ

Յունիսի սկզբներին ճեմարանի ուսուցչութեան պաշտօններից հրաժարուեցին Կարապետ, Գարեգին և Երուանդ վարդապետները և պ. պ. Ս. Տիգրանեան, Յովհաննէս Յովհաննիսեան և Գէորգ Ղազարեան։ Արժանապատիւ Գարեգին վարդապետը հրաժարուեց նաև տեսչական պաշտօնից։ Նրա տեղը դեռ ոչ ոք չի նշանակուած, բայց չընայելով այս բանին, հայր Գարեգինը ստիպուած էր նոր կարգադրութեան չըստացած թոյլտուութիւն ստանալ և մեկնել այստեղից Պետերբուրգ ապաքինելու իւր հիւանդութիւնը, որը գնալով դժբաղդաբար աւելի սաստկանում է։ Մեկնելուց երկու օր առաջ Գարեգին վարդապետը զբօսանքի ժամանակ Ներսիսեան լճի ափին յանկարծ ուշաթափուել էր և այդ այնքան յաճախ էր կրկնուում, որ լճի ափից ճեմարան բազկաթոռով փոխադրելու համար հարկաւորուեց մէկ և կէս ժամ։ Այդ դէպքը մեծ յուզում առաջ բերաւ մերձաւորների շրջանում, բայց գիշերուայ 10 ժամին Գարեգին հայրսուրբը բաւական ոյժի եկաւ և հետևեալ օրը արձակուրդ ստացաւ Վեհափառ Հայրապետից։

Մայր Աթոռիցս հանքային ջրերն ուղևորուեց Յունիկ վարդապետը, որը գնալու է նաև Նոր Նախիջևան և իւր ծննդավայրը։

Էջմիածնից եռամսեայ արձակուրդով բժշկուելու համար մեկնեց Մեսրոպ վարդապետ Տէր Մովսիսեանը։

Համաձայն իւր խնդրանաց և Հին-Ղրիմի ժողովրդականաց ընտրութեան ս. Խաչ վանքի վանահայր նշանակուեց Եղիշէ ծ. վարդապետ Մուրադեանը և յունիսի 14-ին ուղևորուեց իւր պաշտօնատեղին:

Մայր Աթոռիցս մեկնեց Աղէքսանդրապօլ և այնտեղից Հաւիճ տ. Երուանդ վարդապետը:

Նորին Սրբութեան դիւանապետի պաշտօնակատար նշանակուեց արժանապատիւ Տաճատ վարդապետը,

Մայիսի 10-ի կոնգակից յետոյ Հրաժարական տուն թիֆլիզի թեմի առաջնորդ Գարեգին արքեպիսկոպոս Սաթունեանը, Շուշուայ առաջնորդ Աշոտ եպիսկոպոս Շախեանը և Աստրախանի թեմակալ Արիստակէս արքեպիսկոպոս Սեդրակեանը, և Շամախու առաջնորդ Անանիա եպիսկոպոսը:

✓ Փոխանորդներից Հրաժարական են ուղարկել և խընդրել ընտրութիւններ նշանակել Գանձակի, Գօրւոյ և Ախալցխայի փոխանորդներ Կորիւն, Խորէն և Սիօն վարդապետները:

Նորին Սրբութեան № 693 կոնգակով հրաւիրւում է Համաժողով օգոստոսի 15-ին, որը զբաղուելու է դպրոցական, տնտեսական և ընտրական խնդիրներով:

